

**Eqqumiitsuliornermik Pinngorartitsinermillu Ingerlataqartut suleqatigiiffiata EPI-p nukittorsaaffigineqarnissaa pillugu aningaasatigullu qanoq ingerlanneqarsinnaaneranut tunngasumik misissuisussanik, inassuteqaasiortussanik soqutigisaqartunik attuumassutilinnik suleqatigiissitalioqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut. Suliaq naammassisimassaaq UPA25-mi.**

(Inatsisartunut ilaasortaq Peter Olsen, Inuit Ataqtigiit)

### **Akissuteqaat**

(Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

### **Siullermeerneqarnera**

Inatsisartut aalajangiiffigisassaattut siunnersuuteqartoq Inatsisartunut ilaasortaq Peter Olsen, Inuit Ataqtigiit, siunnersuuteqarneranut Naalakkersuisut sinnerlugit qutsavigaara.

Eqqumiitsuliornikkut Pinngorartitsisut Ingerlatsisullu, EPI nukittorsarneqassasoq Naalakkersuisut isumaqatigivaat.

Tamatumani kulturikkut isumasioqatigiinneq ”Siunissami eqqumiitsuliornikkut ilisarnaaterput” 2022-mi novemberip aallartinnerani ingerlanneqartumi innersuussut nr. 1 tassaasoq ”EPI-p atuuffia sunniuteqartarneralu pitsanngorsarneqassasoq” Naalakkersuisut aamma innersuussutigerusuppaat.

2023-mi EPI-p siulersuisui ingerlalluarnerpaasimangitsut Naalakkersuisut ilisimavaat, tassami taamani siulittaasuusoq siulittaasumullu tullersortaasoq toqqagaaffiup qeqqaannaani tunuarsimammata. Maannakkullu kattuffiup allaffeqarfiani pisortaq nutaaq atorfinitsinneqarsimavoq, taamaalilluni EPI-mi allaffissornikkut ingerlatsineq patajaatsoq qulakkeerneqarluni. Taamatuttaaq kattuffiup 20. november 2023-mi ataatsimeersuarnerani nutaamik siulittaasoqalerpoq nutaanillu siulersuisoqalerluni. Siulersuisut nutaat februar 2024-mi kattuffilerinermik pikkorissartinneqarput, taamaalillunilu EPI-p kattuffittut ullumikkut ingerlanneqarnera qulakkeerneqartut oqaatigisariaqarpoq.

Naalakkersuisut ilisimavaat EPI kattuffeqarfittut ingerlatsineri allaffissornikkullu ingerlatsineri 2023-mi unammillernartoqarsimasoq. Tamatuma kingunerivaa Kalaallit Atuakkiortut kattuffimmiit ilaasortaajunnaarsimaneri. Naalakkersuisulli maluginiarpaat Kalaallit Atuakkiortut kattuffimmut ilaasortanngoqqikkusuppaata EPI tikilluaqqusisoq.

2024-mut ingerlatsineri tapiissutissanik qinnuteqaat Naalakkersuisut tigunikuaat. EPI kattuffittut nukittorsarnissaa siunertaralugu aningaasanik amerlanerusunik kissaateqarpoq, ilaatigut allaffeqarfimmi suliniutissanik suliaqartumik ataatsimik atorfinitsitsinissaq siunertaralugu, taamaalilluni kattuffiup siunertaa kattuffiullu aalajangersagai naapertorlugit ilaasortaareersut saniatigut ilaasortassarsiornissaq siunertaralugu, soorlu peqatigiiffinnik, assilialiorlutik eqqumiitsuliortunik, erinarsoqatigiinnik, isiginnaartitsisartunik, assassukkanik kusanartuliortartunik il.il., nunalu tamakkerlugu immikkoortuanilu peqatigiiffinnik kattuffinnillu ilaasortaqarnerulernissaq anguniarlugu.

Taamaalilluni EPI-p ingerlatsinermut aningaasartuutissanut taperneqarnissamik qinnuteqarnera naapertorlugu ukioq manna Naalackersuisut tapiissutitut aningasaliissutigaat 1 mio. kr.-nit, siorna 800.000 kr. tapiissutigineqarnikuusut. EPI aningaasalersorneqarpoq konto pingaarneq 40.95.01 Eqqumiitsuliornermut kulturimullu tapiissutit allat naapertorlugu.

Allaffissornikkut, kattuffittut aaqqissuussaannikkut, aningaasaqarnikkullu unammillernartuusimasut maanna Naalackersuisut kattuffik qaangiisimasutut nalilerpaat, maannakkullu kattuffiup siunertani naapertorlugu ingerlalersimanera maluginiarlugu.

Inatsimmi tunngaviusuni § 78 naapertorlugu nunatsinni peqatigiiffiit kattuffiillu kiffaanngissuseqarnerat Naalackersuisut ataqqisorujussuaat. Taamaalillutik kattuffeqarfinnut EPI-tut ittunut toqqaannartumik toqqaannangitsumilluunniit Naalackersuisut akulerussinnaanngillat. Naalackersuisut taamaalillutik isumaqarput, peqatigiiffiit kattuffiillu iluminni susassaqarfiinut qitiusuminngaaniit akuleruttoqarsinnaanngitsoq akulerunniartoqarsinnaanngitsorlu.

Siuliani tunngavilersuutikka tunulequtaralugit EPI-p nukittorsaaffigineqarnissaa pillugu aningaasatigullu qanoq ingerlanneqarsinnaaneranut tunngasumik misissuisussanik, inassuteqaasiortussanik soqutigisaqartunik attuumassutilinnik Naalackersuisut suleqatigiissitalioqqullugit peqquneqarnissaannik Inatsisartut aalajangiiffigisassaattut siunnersuut Naalackersuisut innersuussutigivaat ilalerneqassanngitsoq.